



Nuuk, 24. marts 2015

Inatsisartut suleriaasiat § 37 malillugu, immikkoortoq 1 naapertorlugu matumuuna Naalackersuisunut apeqqut imaattoq saqqummiuppara:

Naalackersuisunut apeqqutit:

- 1. Royal Greenland A/S Kalaallit Nunaata kitaata avannaani qaleralinnik 1.500 tonsinik ukiut tamaasa pisassinneqartassava?**
- 2. Sooq aalisariutaatileqatigiiffik Royal Pelagic, Royal Greenland A/S-ip piginneqataaffigisaa, ammassannik pisassinneqarsimava?**
- 3. Royal Pelagic-ip, Royal Greenland A/S-ip piginneqataaffigisaata, kilisaataataa inuit nerisassaannik tunisassiornissamut/uninngatitsinissamut akuersissuteqangikkaluarluni ammassannillu pisassiissutinik pigisaqangikkaluarluni ammassanik tulaasseriarsimanerigalua akuersaarneqarsinnaava?**
- 4. Kilisaatini Tuneq aamma Tasiilaq, Royal Pelagic-imit pigineqartuni, inuttat akissarsiaasa allagartaat inuttanut Royal Pelagic tunniussisimangila?**
- 5. Royal Pelagic 2014-imi aalisartunik nunanit allamiunik inuttaqarnissamut sooq immikkut akuerineqarsimava?**

(Inatsisartunut Ilaasortaq Per Rosing-Petersen, Partii Naleraq)

Tunngavilersuutit:

Piffissami kingullermi malunnarsigaluttuinnarpoq, Namminersorlutik Oqartussat pigisaat Royal Greenland A/S aalisariutaatileqatigiiffinnut allanut sanilliullugu Naalackersuisunit salliutinneqartartoq. Tamanna Sermitsiaq-mi Islandimilu aviisini atuarneqarsinnaavoq.

1 pillugu. Royal Greenland A/S Kalaallit Nunaata kitaata avannaani ukiut aappasaat qaleralinnik 1.500 tonsinik pisassinneqarpoq. Pisassiinermut Naalackersuisut tunngavilersuutigaa tamanna suliffissaqartitsinermik kinguneqassasoq. Tassunga atatillugu apeqqut tassaavoq Royal Greenland A/S-imut pisassiineq suliffeqarfinnut allanut sanilliullugu qanoq ililluni suliffissaqartitsinerulernersoq, suliarimi taannaannaaginnarpoq.

2 pillugu. Royal Pelagic, Royal Greenland A/S-ip piginneqataaffigisaa, avaleraasartuunik aalisarnissaq siunertarlugu pilersinneqartoq, ammassannik pisassinneqarpoq, naak suliffeqarfik

siornatigut ammassannik pisassiissummik pigisaqarnikuunngiluortoq. Tassunga tunngatillugu oqatigineqassaaq, aalisariutaatileqatigiiffiit aalisakkanik aalaajangersimasunik pisassiissummik pigisaqareersut, aalisakkanik taakkuninnga pisassiinermi salliutinneqartartut.

3 pillugu. Islandimi tusagassiuutit ulluni kingullerni sammisorujussuuaat, kilisaat, Royal Pelagic-imit pigineqartoq, ammassannik tulaasseriarsimagaluortoq, naak kilisaat Islandimi tusagassiuutit taanna kilisaat inuit nerisassaannik uninngatitsinissamut akuersissuteqanngikkaluortoq.

Tusagassiuutit oqaluttuaraat kilisaat unnuaannakkut usingiariaraluarsimasoq. Sakkortuumik erseqqissarneqassaaq pissutsit pisullu taamaattut Kalaallit Nunaata Islandillu akornanni atassuteqarnerat ajoqusersinnaagaat.

4 pillugu. Royal Pelagic-ip kilisaataataani, Tuneq aamma Tasiilaq, inuttat oqaluttuarput ammassanniarnermut avaleraasartoorniarnermullu atatillugu akissat akilernerqarneranni akissarsiat allagartaat tunniunneqarsimanngitsut. Tassunga atatillugu pissusissamisoortumik apeqqut pinngorpoq, suliffeqarfiup akissarsianit taakkuninnga akileraarutissat ilanngaatisimanerai akilersimaneraalu.

5 pillugu. Royal Pelagic aalisartunik nunanit allaneersunit inuttaqarnissamut 2014-imi immikkut akuerineqarpoq, tassanilu kalaallit aalisartut ikinnerullutik. Tassunga atatillugu ilisimatitsissutigineqassaaq aalisariutaatileqatigiiffiit allat kalaallinik aalisartunik inuttaqarniarneq ajornartorsiutigini kuunngikkaat.

Qaluuni taaneqartuni ersarippoq Royal Greenland immikkut ajunngitsumik pineqarsimasoq. Suliffeqarfik qaleralinnik ammassannillu immikkut/immikkut ittunik pisassinneqarpoq, kilisaat suliffeqarfiup piginneqataaffigisaa inuit nerisassaannik tunisassiornissamut / uninngatitsinissamut akuersissuteqarani uninngatitsisimavoq ammassanniarsimalluni, inuttaqarniarnermi pissutsit aqussinnaasimanngilaat. Pissutsit kingulliit taaneqartut taakku suliffeqarfimmut maannamut kinguneqartinneqarnikuunngillat.